

CABINET CYNGOR GWYNEDD

Adroddiad i gyfarfod Cabinet Cyngor Gwynedd

Dyddiad:	12fed o Fedi 2017
Teitl yr Eitem:	Adroddiad Perfformiad yr Aelod Cabinet Prifffyrdd a Bwrdeistrefol
Pwrpas:	Derbyn a nodi'r wybodaeth yn yr adroddiad
Aelod Cabinet:	Y Cynghorydd Gareth Griffith
Swyddog Cyswllt:	Dilwyn Williams, Prif Weithredwr

1. CYFLWYNIAD

- 1.1. Pwrpas yr adroddiad yma yw diweddarau fy nghyd aelodau ar yr hyn sydd wedi digwydd yn y meysydd yr wyf yn gyfrifol amdanynt fel yr Aelod Cabinet Prifffyrdd a Bwrdeistrefol. Bydd hyn yn cynnwys amlinellu'r hyn sydd wedi digwydd yn erbyn addewidion Cynllun y Cyngor 2017/18; lle mae'r mesurau perfformiad arni; a'r diweddaraf o ran cynlluniau arbedion a thoriadau.
- 1.2. Yr unig addewidion sy'n berthnasol i Gynllun y Cyngor yw'r cynlluniau arbedion ac mae yna ddiweddariad ar y rhain yn rhan 4 o'r adroddiad..
- 1.3. Byddwn yn eich atgoffa fod yr holl faterion eisoes wedi bod yn destun trafodaeth ac wedi eu craffu mewn cyfarfodydd o'r Timau Rheoli oedd hefyd yn cynnwys cynrychiolwyr o'r Pwyllgorau Craffu perthnasol.
- 1.4. Ar y cyfan, rwy'n fodlon gyda pherfformiad y mesurau yr wyf yn gyfrifol amdanynt.

Cyswllt:
01286 679868
01286 679490

cabinet@gwynedd.llyw.cymru



2. Y PENDERFYNIAD A GEISIR

2.1 Derbyn a nodi'r wybodaeth yn yr adroddiad.

3. Y RHESWM DROS YR ANGEN AM BENDERFYNIAD

3.1. Er mwyn sicrhau rheoli perfformiad effeithiol.

3. PERFFORMIAD

Adran Priffyrdd a Bwrdeistrefol

- 3.1. Mae cynnal amgylchedd lleol o safon uchel ac edrychiad strydoedd a mannau cyhoeddus yn bwysig i drigolion Gwynedd. Gwaith yr uned **Gwasanaethau Stryd** yw cadw ein strydoedd yn lan a thaclus a cheir nifer o fesurau sy'n edrych ar ba mor dda y maent yn gwneud hyn. Mae perfformiad y **Mesur o Lendid ac Edrychiad Strydoedd (Mesur STS/005a)** hyd yma eleni yn 79.5 gan ddangos gwelliant ar berfformiad diwedd blwyddyn 2016/17 o 75.7, ac yn rhagori ar bob perfformiad blynyddol ers 2013/14.
- 3.2. Mae'r **Gwasanaeth Gwastraff ac Ailgylchu** yn gyfrifol am ymdrin â gwastraff mewn modd cynaliadwy. Rwy'n fodlon gyda pherfformiad y mwyafrif o'r mesurau ar gyfer y gwasanaeth hwn ond byddwn yn tynnu eich sylw at y pwyntiau canlynol.
- 3.3. Nodir bod y lefelau **Canran y gwastraff trefol a gesglir gan yr Awdurdod Lleol ac a gaiff ei baratoi ar gyfer ei aildddefnyddio, ailgylchu neu gompostio (Mesur WMT/009)** wedi gostwng o 62.34% ar ddiwedd 2016/17 i 59.98% yn y cyfnod o Ebrill i Fehefin. Gellir priodoli tua 1% o'r gostyngiad hwn i'r ffaith bod llai o wastraff gardd yn cael anfon i'w drin o ganlyniad i'r trefniadau i dalu am y gwasanaeth a gyflwynwyd ym mis Ionawr (amcangyfrifwyd y gallai'r effaith fod cymaint a 3% o leihad yn y lle cyntaf).
- 3.4. Mae 1% pellach o'r gostyngiad o ganlyniad i'r ffaith fod gwastraff wedi ei ddal yn ôl cyn ei drin tra bod cytundeb newydd i ymdrin a'r gwastraff yn cael ei gadarnhau. Erbyn hyn mae'r cytundeb hyn yn ei le a rhagwelir y bydd y sefyllfa yn gwella.
- 3.5. Gwelir bod **Canran y gwastraff trefol yrrwyd i'w dirlenwi (Mesur WMT/004)** yn 35.19% yn y cyfnod Ebrill i Fehefin, sy'n gynnydd o'i gymharu â 30.62% ar gyfer y flwyddyn 2016/17. Wrth edrych yn ôl ar batrymau hanesyddol, mae'r ffigur hwn yn aml yn uwch yn y chwarter cyntaf, felly ar hyn o bryd dydw i ddim yn pryderu y bydd y cynnydd yn parhau. Ar gyfer adroddiadau i'r dyfodol rwyf hefyd wedi gofyn am wybodaeth gymharol ar gyfer yr un cyfnod yn y flwyddyn.
- 3.6. Mae'r **Canran lefelau ailgylchu/compostio masnachol (Mesur PB51)** hefyd yn dangos gostyngiad yn y cyfraddau ailgylchu/compostio gan fusnesau. Gyda gofynion cenedlaethol yn ei gwneud yn orfodol i fasnachwyr ddidoli eu gwastraff mae Grŵp Tasg wedi ei sefydlu sy'n edrych brosesau er mwyn ei wneud yn fwy

deiniadol iddynt yn ariannol. Byddaf yn cadw golwg ar y gwaith hyn er mwyn gweld os y bydd yn cael effaith ar y cyfraddau.

- 3.7. Fel y nodwyd yn adroddiadau perfformiad diwethaf fy rhagflaenydd yr hyn sy'n bwysig i bobl Gwynedd yw bod eu gwastraff yn cael ei gasglu ar y dyddiad cywir. Er nad ydym wedi cynnwys mesur ar hyn yn y set o fesurau eto gallaf adrodd bod 1.086 miliwn o gasgliadau gwastraff wedi cael eu gwneud yn y cyfnod o Ebrill i Fehefin gyda 2,372 o gwynion wedi eu derbyn nad oeddem wedi casglu (neu 0.22%).
- 3.8. Mae dadansoddiad wedi ei wneud i ganfod y rhesymau pam er mwyn gwella y gwasanaeth. Ar yr olwg gyntaf 'roedd tua hanner yr achosion yn deillio oherwydd camgymeriad y gwasanaeth a'r hanner arall oherwydd methiant i roi'r cynhwysydd allan neu roi'r cynhwysydd anghywir allan. Bydd y mesur hwn yn cael ei gynnwys fel rhan o fesurau'r Adran yn y dyfodol.
- 3.9. Mae'n bwysig bod busnesau a thrigolion Gwynedd yn medru symud yn rhwydd a diogel o fewn y Sir a nod y Gwasanaeth Priffyrdd yw cyflawni hynny gan geisio cynnal safon ein ffyrdd. Yn flynyddol y caiff y mesurau ar safon y ffyrdd eu mesur a disgwylir y bydd yr asesiad nesaf yn cael ei gwblhau yn ystod mis Tachwedd.
- 3.10. Nodir bod perfformiad y mesur **Nifer o ddyddiau gymerwyd ar gyfartaledd yn ystod y flwyddyn i atgyweirio holl ddiffygion ar lampau stryd (Mesur THS/009)** yn parhau i wella gyda'r achosion yn cymryd 2.34 diwrnod ar gyfartaledd yn y cyfnod dan sylw o'i gymharu a chyfartaledd o 2.52 yn 2016/17 a 2.76 yn 2015/16.
- 3.11. Fodd bynnag, daeth i'r amlwg fod y mesur yn cynnwys achosion sydd o fewn rheolaeth y Cyngor yn unig ac nid yw'n cynnwys y rhai sy'n gyfrifoldeb ar Scottish Power. Gan mai'r amser y mae'r ei gymryd i atgyweirio'r lamp sy'n bwysig i drigolion Gwynedd heb ystyried pwy sydd a chyfrifoldeb am wneud hynny wedi gofyn am fesur sy'n cofnodi hyn i'r dyfodol er mwyn rhoi gwir adlewyrchiad o'r sefyllfa.

Adran Ymgynghoriaeth Gwynedd

- 3.12. Ar gyfer yr Adran yma mae un prif fesur wedi ei adnabod sef Elw yn erbyn targed. Nodir fod y sefyllfa yn gymharol gadarnhaol ar gyfer y cyfnod o Ebrill i Mehefin gyda'r tafuniad diweddaraf yn rhagweld diffyg o £62,153 ar ddiwedd y flwyddyn. Mae hyn yn cymharu'n ffafriol gyda'r sefyllfa yn yr un cyfnod mewn blynyddoedd blaenorol lle'r oedd diffyg o £110,081 yn 2016/17 a diffyg o £165,056 yn 2015/16.
- 3.13. Fel sydd wedi ei nodi mewn adroddiadau gan fy rhagflaenydd mae pwyslais y mwyafrif o'r Unedau o fewn yr Adran hon ar greu incwm ond mae agweddau o waith yr **Uned Rheolaeth Adeiladu** a'r **Uned Dŵr ac Amgylchedd** yn cael effaith uniongyrchol ar drigolion Gwynedd.
- 3.14. Mae'r **Uned Rheolaeth Adeiladu** yn gyfrifol am sicrhau bod gwaith adeiladu yn cwrdd â'r safonau adeiladu gan wneud yn siŵr fod adeiladau yn ddiogel, iach, yn effeithlon o ran defnydd ynni ynghyd â darparu cyfleusterau i'r anabl.

- 3.15. Dengys y wybodaeth ar gyfer **Arolwg bodlonwydd y cwsmer, y ffigwr ar gyfartaledd a roddir gan gleientiaid am eu gwasanaeth rheolaeth adeiladu (sgôr allan o 10) (Mesur BC-1)** bod y sgôr cyfartalog ar gyfer y cyfnod Ebrill i Mehefin yn 9.4 allan o 10 sy'n gyson hefo perfformiad cyfartalog 2016/17 o 9.3. Rwyf wedi gofyn i'r Rheolwr nodi unrhyw faterion a amlygwyd gan gwsmeriaid ynghyd a chamau sydd wedi eu rhoi yn eu lle er mwyn ymateb pan yn adrodd yn y dyfodol. Yn ogystal, rwyf hefyd wedi awgrymu y dylid cyflwyno'r wybodaeth fel graff dros amser er mwyn dangos tueddiadau.

4. SEFYLLFA ARIANNOL/ ARBEDION

Adran Priffyrdd a Bwrdeistrefol

Cynlluniau 2013/14 – 2015/16

- 4.1. Mae dau gynllun hanesyddol gwerth cyfanswm o £80,000 heb eu gwireddu:
- 4.1.1. Erbyn hyn mae'r Adran yn gallu symud ymlaen gyda'r cynllun **Toiledau Cyhoeddus (PB17)** (£40,000) yn dilyn cymeradwyaeth i gynllun gwireddu amgen gan y Cabinet ar y 27ain o Fehefin 2017.
- 4.1.2. Gyda'r cynllun **Rhesymoli Banciau Ailgyrchu (PB19)** (£40,000), daeth yn amlwg y bydd gweithredu fel yr oedd wedi ei ragweld yn her, ac o ganlyniad mae'r Adran yn edrych eto ar hyn gyda'r bwriad o adrodd yn ôl i'r Cabinet yn fuan.

Cynlluniau 2016/17 – 2018/19

- 4.2. Fel yr ydych yn ymwybodol, bu i'r oll o'r arbedion effeithlonwydd a'r toriadau oedd wedi'u rhaglennu i'w cyflawni yn 2016/17 gael eu gwireddu.
- 4.3. Er bod cynnydd derbyniol iawn wedi ei wneud tuag at wireddu y rhan fwyaf o gynlluniau 2017/18 a 2018/19, mae ychydig o bryder yn parhau gyda dau ohonynt:
- 4.3.1. Gyda cynllun **Lleihau Amllder Torri a Threfn Chasglu Gwair Trefol (PB28)** (£50,000) mae yna bryder y byddai goblygiadau parhau i dorri'r gyllideb yn fwy na'r hyn a ragwelwyd yn wreiddiol pan wnaed y penderfyniad i dorri. O ganlyniad, rwyf yn bwriadu gofyn i'r Pwyllgor Craffu edrych ar opsiynau amgen ar gyfer gwireddu'r arbediad.
- 4.3.2. Mae arbenigwyr yn edrych ar opsiynau ar gyfer gweithredu y cynllun **Canolfannau Ailgyrchu (PB5)** (£96,000) ar hyn o bryd a rhagwelir y byddaf mewn sefyllfa i adrodd yn ôl i chi o fewn yr wythnosau nesaf.
- 4.4. Rwy'n ymwybodol y bydd y llithriadau a nodir uchod yn debygol o olygu gorwariant o fewn yr Adran ond mae camau yn eu lle i edrych ar oblygiadau hynny a sut y gellir pontio unrhyw ddiffyg.

Adran Ymgynghoriaeth Gwynedd

- 4.5. Yn ystod 2017/18 mae tri chynllun, sy'n ymestyniad o gynlluniau o'r blynyddoedd blaenorol, wedi eu rhaglennu ac eisoes wedi eu gwireddu.

5 CAMAU NESAF AC AMSERLEN

- 5.1 Dim i'w nodi.

6 UNRHYW YMGYNGHORIADAU A GYNHALIWDYD CYN ARGYMELL Y PENDERFYNIAD

6.1 **Barn y Swyddogion Statudol:**

i. **Y Swyddog Monitro:**

Dim sylwadau o safbwynt priodoldeb.

ii. **Y Pennaeth Cyllid:**

Rwyf yn fodlon fod cynnwys yr adroddiad yn adlewyrchiad teg o'r sefyllfa ariannol. Bydd swyddogion o'r Adran Cyllid yn cefnogi'r Adran Priffyrdd a Bwrdeistrefol wrth iddo fynd i'r afael â'r materion hynny a nodir yn Rhan 4 yr adroddiad o safbwynt gwireddu rhai o'r cynlluniau arbedion.

6.2 **Barn yr Aelod Lleol:**

6.2.1 Ddim yn fater lleol.

6.3 **Canlyniad Unrhyw Ymgynghoriad:**

6.3.1 Dim i'w nodi.

Atodiadau

Atodiad 1 – Mesurau Perfformiad